

四庫全書

集部

欽定四庫全書

集部

御選歷代詩餘卷四十五

詳校官中書

臣

潘有為

侍讀臣孫球覆勘

總校官進士

臣

朱鈐

校對官主事

臣

陳文樞

謄錄監生

臣

方汝觀

欽定四庫全書

御選歷代詩餘卷四十五目錄

起六十七字
至七十字

感皇恩

又一體

晁補之

二首

賀鑄

毛滂

二首

晁沖之

二首

周紫芝

三首

葛郊

二首

周邦彥

二首

趙企

蔡伸

王庭珪

康與之

曾覲

辛棄疾

二首

陸游
二首

韓澆
二首

黃昇

韓玉

党懷英

李俊民

王惲

吳子孝

馮盛世

解佩令

又一體

晏幾道

看花回

又一體

柳永

夢行雲

吳文英

鳳凰閣

趙師俠

賣花聲

又一體

莫是龍

垂絲釣

又一體

袁去華

三翼子

元好問

王惲

天仙子

張先

五首

趙令畤

周紫芝

呂渭老

張元幹

程垓

楊慎

吳子孝

夏復

王微

青玉案

又一體

歐陽修

晁補之

曹組

張榘

二首

吳子孝

前調 又一體

張槃

周用

張大烈 二首

前調 又一體

裴昌今

兩同心

晏幾道

黃庭堅

前調

又一體

柳永

楊无咎

行香子

又一體

杜安世

拾翠羽

張孝祥

帶人嬌 又一體

晏殊 三首

蘇軾

歸田樂 又一體

晏幾道

獻衷心 又一體

顧夐

佳人醉

柳永

數花風

張炎

月上海棠

陸游

二首

前調

又一體

段克己

段成已
二首

小桃紅

晏殊
二首

程垓

余桂英

惜黃花

史達祖

雨中花令
又一體

周紫芝

御選歷代詩餘卷四十五目錄

欽定四庫全書

御選歷代詩餘卷四十五

起六十七字至七十字

司經局洗馬掌局事兼翰林院修撰加二級臣王奕清奉

旨校刊

感皇恩

又一體雙調六十七字第三句或於第五字逗且有叶韻者然無分體也

感皇恩

海棠

晁補之

常歲海棠開偷閒須到多病尋芳嬾春老偶來恰值半

欽定四庫全書

御選歷代詩餘

卷四十五

一

謝妖嬈猶好便呼詩酒伴同傾倒
繁枝高蔭疎枝低
繞花底杯盤花影照多情一片恨我歸來不早斷腸鋪
碎錦門前道

前調

晁補之

終歲憶春回西園行盡歡喜梅梢上春信去年攜手暗
約芳時還近燕來鶯又到人無準
憑誰向道流光一
瞬佳景閒過舞衣褪春歸何處又對飛花難問舊歡都
未遇成新恨

前調

賀鑄

蘭芷滿汀洲。游絲橫路。羅襪塵生步。迎顧整鬟顰黛。脈脈多情難語。細風吹柳絮。人南渡。回首舊游山無重。數花底深朱戶。何處半黃梅子。向晚一簾疎雨。斷魂分付與春歸去。

前調

鎮江待問

毛滂

綠水小湖亭。朱闌碧甃。江月娟娟上高柳。畫樓縹緲盡。挂牕紗簾繡。月明知我意來相就。銀字吹笙金貂取。

酒小小微風弄襟袖寶熏濃炷人共博山煙瘦露涼釵
燕冷更深後

前調

晚酌

毛滂

多病酒尊疎飲少輒醉年少銜杯可追記無多酌我醉
倒阿誰扶起滿懷明月冷爐煙細雲幙雖高風波無
際何似歸來醉鄉裏玻瓈缸上滿載春光花氣蒲萄仙
浪軟迷紅翠

前調

寒食

晁沖之

寒食不多時牡丹初賣小院重簾燕飛礙昨宵風雨尚
有一分春在今朝猶自得陰晴快熟睡起來宿醒微
帶不惜羅襟揜睂黛日長梳洗看著花陰移改笑拈雙
杏子連枝戴

前調

晁沖之

蝴蝶滿西園啼鶯無數水閣橋南路凝佇兩行煙柳吹
落一池風絮秋千斜挂起人何處把酒勸君閒愁莫
訴留取笙歌住休去幾多春色怎禁許多風雨海棠花

謝也君知否

前調

除夜

周紫芝

玉筍點椒花年華又杪絳蠟燒殘暗催曉小牕醒處夢
斷月斜江悄故山春欲動歸程杳天意不放人生常
少富貴應須致身早此宵長願贏取一尊娛老假饒真
百歲能多少

前調

送晁別駕

周紫芝

江上一山橫偶來同住山北山南共來去今朝何事目

送征鴻輕舉可堪吹不斷梨花雨 千里莫厭重霄雲
路飛下彤庭伴鵷鷺紫駟烏帽看盡章臺風絮故人應
問我今何處

前調

送侯彦嘉
歸彭澤

周紫芝

何處是雲菴本來無住雲共誰來共誰去菊籬杯酒聊
為淵明頻舉幅巾應漉濕斜川雨 此去常恨相從無
路記取孤飛水邊鷺重來一笑又是柳飄殘絮夢魂知
不到君閒處

前調

葛 郊

風雨半摧殘一園花老綠徧池塘夜來草看花何處莫
被此花相惱世間多少事邯鄲道 憑水下臨暗塵飛
繞數點煙中水村小斜陽且住為我花間留照從教紅
滿地何須埽

前調

葛 郊

花似鏡中人不堪衰老空羨青青岸邊草多情消瘦更
被無情相惱近來無限事憑誰道 蝴蝶滿園叢邊空

繞睡起流鶯語聲小
瑣牕危坐更被玉蟾孤照
夜闌梅影瘦憑誰埽

前調

周邦彥

露柳好風標嬌鶯能語
獨占春光最多處
淺顰輕笑未肯等閒分付
為誰心子裏長長苦
洞房見說雲深無路
憑仗青鸞道情悵
酒空歌斷又被濤江催度
怎禁言不盡愁無數

前調

周邦彥

小閣倚晴空數聲鐘定斗柄垂寒暮天靜朝來殘酒又被春風吹醒眼前猶認得當時景往事舊歡不堪重省自歎多愁更多病綺牕依舊敲徧闌干誰應斷腸明月下梅搖影

前調

趙企

騎馬踏紅塵長安重到人面依然似花好舊歡纔展又被新愁分了未成雲雨夢巫山曉千里斷腸關山古道回首高城似天香滿懷離恨付與落花啼鳥故人何

處也青春老

前調

蔡伸

酒暈襯橫波玉肌香透輕裊腰肢如垂柳臂寬金釧且
不是干春瘦撚金雙合字無心繡鬢雲半墮玉釵欲
溜羅袂殘香忍重熏渡江桃葉腸斷為誰招手倚闌凝
望久睂空闌

前調

王庭珪

一葉下西風寒生南浦椎鼓鳴撓送君去長亭把酒却

倩阿誰留住尊前人似玉能留否
醉中暫聽離歌幾
許聽不能終淚如雨無情江水斷送扁舟何處歸時煙
浪捲珠簾暮

前調

康與之

一雨一番涼江南秋興門掩蒼苔鎖寒徑紅塵不到盡
日烏啼人靜綠荷風已過搖香柄
澹陰未解園林清
潤一片飛花墮紅影殘書讀盡袖手高吟清詠任從車
馬客勞方寸

前調

重到
臨安

曾觀

依舊惜春心花枝常好只恐尊前被花笑少年青鬢耐
得幾番重到舊歡重記省如天杳綺陌青門斜陽芳
草今古銷沉送人老帝城春事又是等閒來了亂紅隨
過雨鶯聲悄

前調

辛棄疾

春事到清明十分花柳喚得笙歌勸君酒酒如春好春
色年年依舊青春元不老君知否席上看君竹清松

瘦待與青春鬪長久三山歸路明日天香襟袖更持金
盞起為君壽

前調

讀莊子傷
朱晦庵

辛棄疾

案上數編書非莊即老會說忘言始知道萬言千句不
自能忘堪笑今朝梅雨霽青天好一壑一丘輕衫短
帽白髮多時故人少子雲何在應有玄經遺草江河流
日夜何時了

前調

伯禮立
春生日

陸游

春色到人間綵旂初戴正好春盤細生菜一般日月只
有仙家偏耐雪霜從點鬢朱顏在 溫詔鼎來延英催
對鳳閣鸞臺看除拜對衣裁穩恰稱毬紋新帶箇時方
旋了功名債

前調

陸游

小閣倚秋空下臨江渚漠漠孤雲未成雨數聲新鴈回
首杜陵何處壯心空萬里人誰許 黃閣紫樞築壇開
府莫怕功名欠人做如今熟計只有故鄉歸路石帆山

脚下菱三畝

前調

韓 流

急管度青枝醉眠芳草雲斷巫陽夢能到乍醒餘因晴
影暗移紗帽舊時閒意思都忘了今歲春遲去年春
早點點繁紅又多少惜春歸去酒病翻成花惱數聲啼
鳥喚人春曉

前調

韓 流

詩社酒徒間村花村柳月榭風亭更霞牖臨春結綺又

是那回時候不禁中夜雨相儼懔
弄蕊攀條為尋芳
酒一斗誰能問千首江南雲夢空
說氣吞八九持杯人
共我能吟否

前調

送饒溪
臺游浙

黃昇

騎鶴上揚州腰纏十萬拈起詩人舊公案
看山看水此
去勝游須徧煩君收拾取歸吟卷
少日風流暮年蕭
散佳處何妨小留款沙河塘上落日繡簾爭捲也
須拂
拭起看花眼

前調

廣東與
康伯可

韓玉

遠柳綠含煙土膏才透雲海微茫露晴岫故鄉何在夢
寐草堂溪友舊時游賞處誰攜手塵世利名於身何
有老去生涯殢尊酒小橋流水一樹雪香寒瘦故人今
夜月相思否

前調

党懷英

一葉下梧桐新涼風露喜鵲橋成渺雲步舊家機杼巧
織紫綃如霧新愁還織就無重數天上何年人間朝

暮回首星津又空渡盈盈別淚散作半空疎雨離魂都
付與秋將去

前調

出京門
有感

李俊民

忍淚出門來楊花如雪惆悵天涯又離別碧雲西畔舉
目亂山重疊據鞍歸去也情悽切一日三秋寸腸千
結敢向青天問明月算應無恨安用暫圓還缺願人長
似月圓時節

前調

王惲

疊嶂際清江楓林輝映潮落波平鏡光靜六朝興廢都
付漁郎煙艇蓴鱸香正美秋風冷 笳鼓歸來風雲增
勝夢裏無煩想幽景風流公子寫出五湖高興畫中須
領取江山影

前調

吳子孝

海上有仙山苦淹城闕歲歲中秋隔明月季秋既望攜
手依然同陟清光千萬里山如雪 玉魄纔圓金尊未
歇丘壑風流兩奇絕廣寒縹緲便欲馭風飛越歸來慎

勿向忙人說

前調

詠鏡

馮盛世

有福共嬋娟相依白首看拂雙蛾似垂柳此中何處有
箇人兒爭瘦笑效顰難效腸迴九春塵飛處有時昏
黝洗面還同美人鬪芙蓉映入疑是瀟湘清瀏怪東風
起處吹難皺

解珮令

又一體雙調

六十七字

欽定四庫全書

御選歷代詩餘

卷四十五

上

解佩令

晏幾道

玉階秋感年華暗去掩深宮團扇無情緒記得當時自
翦下機中輕素點丹青畫成秦女涼襟猶在朱顏未
改忍霜紈飄零何處自古悲涼是情事輕如雲雨倚么
絃恨長難訴

看花回

又一體雙調
六十七字

看花回

柳永

屈指勞生百歲期榮瘁相隨利牽名惹逡巡過奈兩輪
玉走金飛紅顏成白首極品何為塵事常多雅會稀
忍不開眉畫堂歌管深深處難忘酒盞花枝醉鄉風景
好攜手同歸

夢行雲

一名六么花十八
雙調六十七字

夢行雲

吳文英

簾波皺纖縠朝炊熟眠未足青奴細膩未拚真珠斛素

蓮幽怨風前影搔頭斜墜玉
畫闌枕水垂楊梳雨青
絲亂如乍沐嬌笙微韻晚蟬亂秋曲翠陰明月勝花夜
那愁春去速

鳳凰閣

雙調六
十七字

鳳凰閣

已酉歸舟
衡陽作

趙師俠

正薰風初扇梅黃暑溽並搖雙槳去程速那更黃流浩
淼白浪如屋動歸思離愁萬斛平生奇觀頗快江山

寓目日斜雲定晚風熟白鷺飛來點破一川明綠展十
幅瀟湘畫軸

賣花聲

又一體雙調
六十七字

賣花聲

莫是龍

乘興王猷獨放剡溪孤櫂向名園盡情傾倒長夜深尊
莫問東林曉對知音劃然歡笑 繡戶珠簾何處閒情
堪到晃銀屏燈花結早隔院風來過空庭如埽醉歸時

共村翁野老

垂絲釣

又一體雙調
六十七字

垂絲釣

袁去華

江楓秋老曉來紅葉如埽暮雨生寒正北風低草賓鴻
早亂半川殘照傷懷抱記西園飲處微雲弄月梅花
人面爭好路長信杳度日房櫳悄還是黃昏到歸夢少
縱夢歸易覺

三奠子

雙調六十七字唐宋無此調見於元好問錦機集中傳是真酒奠穀奠璧因以名詞崔令欽教坊記

亦有奠璧子也

三奠子

離南陽後作

元好問

悵韶華流轉無計留連行樂地一淒然笙歌寒食後桃李惡風前連環玉迴文錦兩纏緜芳塵未遠幽意誰傳千古恨再生緣閒衾香易冷孤枕夢難圓西牕雨南樓月夜如年

前調 七夕

王惲

悵神光奕奕天上良宵花露濕翠釵翹風回鸞扇影愁
滿紫雲輶恨相望雖一水隔三橋朱絃寂寂心思迢
迢人未老鬢先彫翻騰驚世故機巧到鮫綃涼夜永簫
聲咽篆煙飄

天仙子

雙調六
十八字

天仙子

張先

水調數聲持酒聽午醉醒來愁未醒送春春去幾時回
臨晚鏡傷流景往事後期空記省沙上並禽池上暝
雲破月來花弄影重重簾幕密遮燈風不定人初靜明
日落紅應滿徑

前調

張先

醉笑相逢能幾度為報江頭春且住主人今日是行人
紅袖舞清歌女憑仗東風交點取三月柳枝柔似縷
落絮倦飛還戀樹有情寧不憶西園鶯解語花無數應

詞使君何處去

前調

觀舞

張先

十歲手如芽子筍因愛弄妝偷傅粉金蕉併為舞時空
紅臉嫩輕衣褪春重日濃花覺困斜鴈軋絃隨步趁
小鳳釵珠光繞鬢密教持履恐仙飛催拍緊驚鴻奔風
袂飄飄無定準

前調

鄭設夫
移青社

張先

持節來時初有鴈十萬人家春已滿龍標名第鳳池身

堂阜遠江橋晚一嶂湖山看未徧
障扇欲收歌淚濺
亭下花空羅綺散檣竿漸向望中疎
旗影轉輦聲斷惆
悵不如船尾燕

前調

張先

坐治吳州成樂土詔卷風飛來聖語親與乞得便藩歸
瑤席主杯休數清夜為君歌白苧
花接舊枝新蕊吐
造化不知人有助看花歲歲比甘棠
嘉月暮東門路只
恐帶將春色去

前調

趙令時

宿雨洗空臺榭瑩下盡珠簾寒未定
花開花落幾番晴
春欲竟愁未醒池面杏花紅透影
一紙短書言不盡
明月清風還記省玉樓香斷又添香
閒展興臨好景心
似亂萍何處整

前調

周紫芝

雪似揚花飛不定枝上凍禽昏欲暝
寒牕相對話分飛
簫鼓靜燈炯炯一曲陽關和淚聽
酒入離腸愁欲凝

往事不堪重記省
勸君莫上玉樓梯
風力勁山色暝忍
看去時樓下徑

前調

呂渭老

樓下轆轤橫露井樓上嬋娟開曉鏡
下樓難忘上樓時
風未定帆不正
簌簌珍珠揮塵柄
睂上新愁吹不醒
別酒未斟歌未忍
雪中梅下定重來
煙暝暝腸寸寸莫
放笛聲吹落盡

前調

杏花
留飲

張元幹

樓外輕陰春澹泞數點杏梢寒食雨少年油壁記尋芳
梁苑路今何處千樹紅雲空夢去驚見此花須折取
明日滿城傳侍女情知醉裏惜花深留春住聽鶯語一
段風流天付與

前調

程垓

慘慘霜林冬欲盡又是梅溪寒弄影矮牕曲屋夜香燒
人已靜燈垂燼點滴芭蕉和雨聽約箇歸期猶未定
一夜夢魂終不穩知他勾得許多情真箇悶無人問說

與畫樓應不信

前調

楊慎

蓮葉為舟絲作索渡口梅風歌扇薄一聲留得滿城春
金鑿落銀鑿落醉裏不知愁緒惡別後那回華表鶴
一點芳心無住著雲中誰寄錦書來春寂寞人寂寞綠
徧汀洲生杜若

前調

吳子孝

四面山光如潑黛麥隴連村千萬態海東紅日上層霄

煙靄黦叢林外山北高人應我待
竹繞茅堂長好在
白石清泉仙境界入門雙鶴便相迎
穿蘿艾尋松檜陰
陰空谷鳴清籟

前調

夏復

紫玉轆轤春錦索金井梧桐寒寂寞
霜韞馬上冶游郎
花下約花前諾人在畫樓牽翠幙
無奈愁人春夢惡
淚點羅衫春袖薄一江煙草亂相思
當初錯而今莫鴈
又不來花又落

前調

明妓王微

煙水蘆花愁一片箇中消息難分辨
舉杯邀月不成三君可見儂可見
伊人獨與寒燈面疊盡雲牋情有限
除非做本相思傳幾回擲筆費沉吟
君也念儂也念霜鵲曉路雞聲店

青玉案

又一體雙調
六十八字

青玉案

歐陽修

一年春事都來幾早過了三之二綠暗紅媽渾可事垂
楊庭院暖風簾幕有箇人憔悴買花載酒長安市又
爭似家山見桃李不住東風吹客淚相思難表夢魂無
據惟有歸來是

前調

晁補之

十年不向東門道信匹馬羞重到玉府駭鸞猶年少宮
花頭上御爐煙底常日朝回早霞觴翻手羣仙笑恨
塵土人間易春老白髮愁占彤庭香紅牆天阻碧濠煙

鎖細雨迷芳草

前調

旅情

曹組

田園有計歸須早在家縱貧亦好南去北來何日了先
陰送盡可憐青鬢暗逐流年老寂寥孤館殘燈照正
鄉思驚時夢初覺落月蒼蒼關河曉一聲雞唱馬嘶人
起又上長安道

前調

張榘

少時貪看瓊林繞任馬上寒威峭昨暮六花飛逗曉擁

衾慵起鬢絲籠帽頓覺年來老
朱闌翠竹枝枝倒把
玉甃綾層趁風埽樓上一尊須放早
同雲收盡紅輪初
上對面狼山好

前調

張榘

龍香薰被羅屏繞任牕外風兒峭
鴛枕夢回雞唱曉丫
鬟驚笑瓊枝低亞錯認梅花老
紅爐獸炭裝還倒強
梳洗忙將黛眉埽貪趁清歌爭怕早
弓韉微濕玉纖頻
袖塑出獅兒好

前調

吳子孝

當年苦欲歸南國愛處處尋春色山寺江樓楊柳陌花
開蜂鬧草香鳥嘒簫管人如織四時惟有春堪惜況
常遇江頭詩酒客風雨連朝煙幕幕朱樓頻倚畫船長
樣花落將寒食

前調

又一體

張槩

西風亂葉溪橋樹秋在黃花羞澀處滿袖塵埃推不去
馬蹄濃露雞聲澹月寂歷荒村路身名多被儒冠誤

十載重來慢如許且盡清尊公莫舞六朝舊事一江流
水萬感天涯暮

前調

送楊中丞

周用

太微昨夜輝南紀望望樓船渡湘水公作長城真足倚
新秋離思五雲回首百粵風謠美雙龍宛宛裁黃紙
霖雨橫施幾千里入奏天顏應有喜蓬萊殿裏鳳凰池
上早聽尚書履

前調

社日

張大烈

千條弱柳拖青線應期剛到呢喃燕綠徧川原紅減半
酬神賽會花陰人集深處芳洲畔金罍醺醺頻頻勸
沉入醉鄉斟尚滿解衣欲卧芳草岸花鋪錦裯松羅翠
幕鳥奏無心管

前調

張大烈

春歸難覓馳歸路止眼見芳華飛去落紅香褪風中度
燕老鶯雛花階柳戶盡換韶光處綠暗汀洲煙塢暮
流水無情枉題句蜂蝶閒忙已如許梅豆酸心楊花縈

意惹悶廉纖雨

前調

又一體

裴昌今

數竿疎竹野人家夜來雪打偏斜無端低弄又還遮數
枝橫影道人睡起疑是月籠紗一圍雪色掩籬笆縱
秋水難比這銀沙呼童快煮建溪茶箇箇堪描枝枝若
畫留著伴梅花

兩同心

雙調六十八字唐教坊取古樂府製
曲填詞因以名詞亦名仙源拾翠

兩同心

晏幾道

楚鄉春晚似入仙源拾翠處閒隨流水踏青路暗惹香
塵心心在柳外青帘花下朱門對景且醉芳尊莫話
銷魂好意思曾同明月愁滋味最是黃昏相思處一紙
紅牋無限啼痕

前調

黃庭堅

巧笑顰眉行步精神隱隱似朝雲行雨弓弓樣羅韞生
塵尊前見玉檻彫籠堪愛堪親自言家住天津生小

從人恐舞罷隨風飛去顧阿母教宰珠席從今去惟願
銀缸莫照離尊

前調

又一體

柳永

佇立東風斷魂南國花光媚春醉瓊樓蟾彩迴夜游香
陌憶當時酒戀花迷役損詞客別有眼長腰搦痛憐
深惜鴛鴦阻夕雨淒淒錦書斷暮雲凝碧想別來好景
良時也應相憶

前調

楊无咎

行看不足坐看不足柳條軟斜倚春風海棠睡醉敲紅
玉清堪掬桃李漫山真成麤俗 遙夜幾番相屬暗魂
飛逐深斟酒低唱新聲密傳意解回嬌目知誰福得似
風流可伊心曲

行香子

又一體雙調
六十八字

行香子

柳

杜安世

黃金葉細碧玉枝纖初暖日當乍晴天向武昌溪畔於

彭澤門前陶潛影張緒態兩相牽
數株堤面幾樹橋
邊嫩垂條絮蕩輕絲繫長江
舴艋拂深院秋千寒食下
半和雨半和煙

拾翠羽

雙調六

十八字

拾翠羽

張孝祥

春入園林花信總隨遲
速聽鳴禽稍遷喬木天桃弄色
海棠芬馥風雨霽芳徑草心頻綠
楔事纔過相次禁

煙追逐想千載楚人遺俗青旗沽酒各家炊熟良夜遊
明月勝燒花燭

帶人嬌

又一體雙調
六十八字

帶人嬌

晏殊

二月春風正是揚花滿路那堪更別離情緒羅巾掩淚
任粉痕霑汙爭奈向千留萬留不住玉酒頻傾翠睂
愁聚空腸斷寶箏絃柱人間後會又不知何處魂夢裏

也須時時飛去

前調

晏殊

玉樹微涼漸覺銀河影轉林葉靜疎紅欲徧朱簾細雨
尚遲留歸燕嘉慶日多少世人良願 楚竹驚鸞秦箏
起鴈縈舞袖急翻羅薦雲迴一曲更輕攏檀板香炷遠
同祝壽期無限

前調

晏殊

一葉秋高向夕紅蘭露墜風月好乍涼天氣長生此日

見人中喜瑞斟壽酒重唱妙聲珠綴
鳳筵移宮鈿衫
迴袂簾影動鵲爐香細南真寶錄賜玉京千歲良會永
莫惜流霞同醉

前調

王都尉
侍人

蘇軾

滿院桃花盡是劉郎未見於中更一枝纖軟仙家日月
笑人間春晚濃睡起驚飛亂紅千片
密意難窺羞容
易見平白地為伊腸斷問君終日怎安排心眼須信道
司空自來見慣

歸田樂

又一體雙調
六十八字

歸田樂

晏幾道

試把花期數便早有感春情緒看即梅花吐願花更不
謝春且長住只恐去春去花開還不語此意年年春
會否絳脣青鬢漸少花前語對花又記得舊曾游處門
外垂楊未飄絮

獻衷心

又一體雙調
六十九字

獻衷心

顧 復

繡鴛鴦帳暖畫孔雀屏
故人悄悄月明時
想昔年歡笑
恨今日分離
銀釭背銅漏永阻佳期
小爐煙細虛閣
簾垂幾多心事
暗地思惟被嬌娥牽役
魂夢如癡金閨
裏山枕上始應知

佳人醉

雙調六
十九字

佳人醉

柳永

暮景蕭蕭雨霽雲澹天高風細正月華如水金波銀漢
潏灩無際冷浸書帷夢斷却披衣重起臨軒砌素光
遙指因念翠睂音塵何處相望同千里儘凝睇厭厭無
寐漸曉雕闌獨倚

數花風

亦名鳳凰閣雙
調六十九字

數花風

別義興
諸友

張炎

好遊人老秋鬢蘆花共色征衣猶戀去年客古道依然
黃葉誰家蕭瑟自笑我如何是得酒樓仍在流落天
涯醉白孤城寒樹美人隔煙水此去程應遠須尋梅驛
又漸數花風第一

月上海棠

雙調七
十字

月上海棠

成都蜀
苑古梅

陸游

斜陽廢苑朱門閉弔興亡遺恨淚痕裏淡淡宮梅也依

然點酥翦水凝愁處似憶宣華舊事
行人別有淒涼
意折幽香誰與寄千里佇立江皋杳難逢隴頭歸騎音
塵遠楚天危樓獨倚

前調

陸游

蘭房繡戶厭厭病歎春醒和悶甚時醒燕子空歸幾曾
傳玉闌邊信傷心處獨展團窠瑞錦
熏籠消歇沉煙
冷淚痕深展轉看花影漫擁餘香怎禁他峭寒孤枕西
牕曉幾聲銀餅玉井

前調

又一體

段克己

住山活計宜聞早，身世滄溟一漚小。日月兩跳丸，迭迭人間昏曉。朱顏換，風雪俄驚歲杪。樊衣旋補，荷盈沼。算騎鶴揚州，古今少。休苦似吳蠶，却枉把此身纏繞。君知否，我自無心可了。

前調

段成己

酒杯何似浮名好，一入枯腸，泰山小。喚醒夢中身，鷓鴣數聲春曉。昂頭處，幾點青山屋杪。人生得計，魚游沼。

視過眼花陰向來少須卜一枝安笑月底驚烏三繞無
窮事畢竟何時是了

前調

段成已

光陰輸與閒人手屈指窮冬又初九風雪擁柴關竹外
一枝梅秀醅甕熟似笑淵明止酒溪山舊約吾無負
便結與無情歲寒友世味儘醇醲漫掩鼻向伊慵喫蓬
茅底有手何妨且袖

小桃紅

一名紅娘子一名灼灼花
一名連理枝雙調七十字

小桃紅

晏殊

玉宇秋風至簾幕生涼氣
朱槿猶開紅蓮尚拆芙蓉含蕊
送舊巢歸燕拂高簾見梧桐葉墜
嘉宴凌晨啓金鴨飄香細
鳳竹鸞絲清歌妙舞畫堂游藝
願百千遐壽比神仙有年年歲歲

前調

晏殊

綠樹鶯聲老金井生秋早
不寒不暖裁衣按曲天時正

好況蘭堂逢著壽筵開見爐香縹緲組繡呈纖巧歌
舞誇妍妙玉酒頻傾朱絃翠管移宮易調獻金杯重疊
祝長生永逍遙奉道

前調

程垓

不恨殘花驪不恨殘春破只恨流光一年一度又催新
火縱青天白日繫長繩也留春得麼花院從教鎖春
事從教過燒筍園林嘗梅臺榭有何不可已安排珍簾
小胡牀待日長閒坐

前調

余桂英

芳草連天暮斜日明汀渚懊恨東風恍如春夢匆匆又
去早知人酒病更詩愁鎮輕隨飛絮寶鏡空相覩箏
鴈渾無據門外當時薄情流水如今何處正相思望斷
碧山雲又鶯啼晚雨

惜黃花

雙調七

十字

惜黃花

史達祖

涵秋寒渚染霜丹樹尚依稀是來時夢中行路時節正
思家遠道仍懷古更對著滿城風雨黃花無數碧雲
欲暮美人予美人予未知何處獨自捲簾攏誰為開尊
俎有若箇御風歸去

雨中花令

又一體雙
調七十字

雨中花令

周紫芝

山雨細泉生幽谷水滿平田雪繭紅蠶熟後黃雲隴麥

秋間武陵煙暖數聲雞犬別是山川
嗟老去倦游蹤
跡長恨華顛行盡吳頭楚尾空慚萬壑千巖不如休也
一菴歸去依舊雲山



御選歷代詩餘卷四十五

欽定四庫全書

集部

御選歷代詩餘卷四十六

詳校官中書_臣潘有為

侍讀_臣繇球覆勘

總校官進士_臣朱鈴

校對官主事_臣陳文樞

謄錄監生_臣方汝觀

欽定四庫全書

御選歷代詩餘卷四十六目錄

七十
字

江城子

又一體

蘇軾

十一首

黃庭堅

秦觀

三首

晁補之

三首

李之儀

三首

賀鑄

葛勝仲 二首

周紫芝 二首

謝逸 二首

葛郊 二首

呂渭老 二首

王安中

葉夢得 五首

趙長卿
三首

張元幹

康與之

辛棄疾
八首

曹冠

呂勝已
二首

張鎰

劉儼

劉光祖

黃銖

毛玘

二首

盧祖皋

韓淲

二首

汪莘

方岳

二首

吳文英

六首

陳允平

周密
二首

張炎
二首

石孝友
二首

林正大

曹良史

譚宣子

朱淑真

蔡松年

蔡珪

段克己

段成己

元好問

三首

趙孟頫

張埜

倪瓚

二首

劉基
二首

高啟

施紹莘

沈泓

沈麐
二首

御選歷代詩餘卷四十六目錄

欽定四庫全書

御選歷代詩餘卷四十六

七十

司經局洗馬掌局事兼翰林院修撰加二級臣王奕清奉

旨校刊

江城子

又一體雙
調七十字

江城子

蘇軾

夢中不了了醉中醒只淵明是前生走徧人間依舊却躬

耕昨夜東坡春雨足烏鵲喜報新晴 雪堂西畔暗泉
鳴北山傾小溪橫南望亭丘孤秀聳層城都是斜川當
日境吾老矣寄餘齡

前調

蘇軾

翠蛾羞黛怯人看掩霜紈淚偷彈且盡一尊收淚唱陽
關漫道帝城天樣遠天易見見伊難 畫堂新構近孤
山曲闌干為誰安飛絮落花春色屬明年欲棹小舟尋
舊事無處問水連天

前調

蘇軾

鳳凰山下雨初晴
水風清
晚霞明
一朶芙蓉開過尚盈
盈
何處飛來雙白鷺
如有意
慕娉婷
忽聞江上弄哀
箏
苦含情
遣誰聽
煙斂雲收
依約是湘靈
欲待曲終尋
問取人不見數峰青

前調

蘇軾

天涯流落思無窮
既相逢
却匆匆
攜手佳人和淚折殘
紅
為問東風餘幾許
春縱在與誰同
隋堤三月水溶溶

溶背歸鴻去吳中回望彭城清泗與淮通寄我相思千
點淚流不到楚江東

前調

蘇軾

相逢不覺又初寒對尊前惜流年風緊離亭冰結淚珠
圓雪意留君君且住從此去少清歡轉頭山下轉頭
看路漫漫玉花翻銀海光寬何處是超然知道故人相
念否攜翠袖倚朱闌

前調

獵

蘇軾

老夫聊發少年狂，左牽黃，右擎蒼。
錦帽貂裘，千騎卷平岡。
爲報傾城太守，親射虎，看孫郎。
酒酣胸膽尚開張，鬢微霜，又何妨。
持節雲中，何日遣馮唐。
會挽雕弓如滿月，西北望，射天狼。

前調

大雪懷
朱康叔

蘇軾

黃昏猶是雨纖纖，曉開簾欲平檐。
江闊天低，無處認青帘。
孤坐凍吟誰伴我，揩病目，撚衰髯。
使君留客醉慙慙，水晶鹽。
爲誰甜，手把梅花，東望憶陶潛。
雪似故人人。

似雪雖可愛有人嫌

前調

陳直
方妾

蘇軾

玉人家在鳳凰山水雲間掩門閒門外行人立馬看弓
彎十里春風誰指似斜日映繡簾斑多情好事與君
還憫新鰥拭餘潸明月空江香霧著雲鬟陌上花開看
盡也聞舊曲破朱顏

前調

蘇軾

銀濤無際卷蓬瀛落霞明暮雲平曾見青鸞紫鳳下層

城二十五絃彈不盡空感慨惜離情
蒼梧煙水斷歸程
卷霓旌為誰迎
空有千行流淚寄幽貞
舞罷魚龍雲海晚
千古恨入江聲

前調

蘇軾

前瞻馬耳九仙山
碧連天
晚雲間
城上高臺真箇是
超然莫使匆匆雲雨散
今夜裏
月嬋娟
小溪鷗鷺靜聯拳
去翩翩
點輕煙
人事淒涼回首便他年
莫忘使君歌笑處
垂柳下
矮槐前

前調

蘇軾

墨雲拖雨過西樓。水東流。晚煙收。柳外殘陽，回照動簾鉤。今夜巫山真箇好，花未落，酒新篘。美人微笑轉星眸。月華羞。捧金甌。歌扇縈風，吹散一春愁。試問江南諸伴侶，誰似我，醉揚州。

前調

憶別

黃庭堅

畫堂高會酒闌珊。倚闌干。霎時間。千里關山，常恨見伊難。及至而今相見了，依舊是，隔關山。倩人傳語問平安。

安省愁煩淚休彈
哭損眼兒不似舊時單
尋得石榴雙葉子
憑寄與插雲鬟

前調

秦觀

西城楊柳弄春柔
動離憂淚難收
猶記多情曾為繫歸舟
碧野朱橋當日事
人不見水空流
韶華不為少年留
恨悠悠幾時休
飛絮落花時候一登樓
便做春江都是淚
流不盡許多愁

前調

秦觀

南來飛燕北歸鴻
偶相逢慘愁容
綠鬢朱顏重見兩衰
翁別後悠悠君莫問
無限事不言中
小槽春酒滴珠
紅莫匆匆滿金鍾
飲散落
花流水各西東
後會不知何
處是煙浪遠暮雲重

前調

秦觀

棗花金釧約柔荑
昔曾攜事難期
咫尺玉顏和淚鎖金
閨恰似小園桃與李
雖同處不同枝
玉笙初度顫鸞
篋落花飛為誰吹
月冷風高此恨只天知
任是行人無

定處重相見是何時

前調

亳社
觀梅

晁補之

去年初見早梅芳一春忙短紅牆馬上不禁花惱只顛
狂蘇晉長齋猶好事時喚我舉離觴今年春事更茫
茫淺宮粧斷人腸一點多情天賜骨中香頓有飛鳬賢
令尹同我過小橫塘

前調

廣陵送
王左丞

晁補之

舊山鉛槧倦棲遲叩宸闈向淮圻五馬行春初喜後車

隨太守風流容客醉花墮帽酒淋衣
隋宮煙外草萋萋菊花時動旌旂起舞留公且住慰相思
王粲詩成何處寄人北去雁南飛

前調

贈娉娉

晁補之

娉娉聞道似輕盈
好佳名也堪稱
楚觀雲歸重見小樊
驚豆蔻梢頭春尚淺
嬌未顧已傾城
章臺休咏舊青
青惹離情恨難平
無事飛花撩亂撲旗亭
不似劉郎春草小
能步步伴人行

前調

李之儀

惱人天氣雪消時
落梅飛日初遲
小閣幽牕時節聽黃鸝
新洗頭來嬌困甚
才試著夾羅衣
棠梨花拂淡臙脂
翠雲歌斂雙眉
月淺星深天淡
玉繩低不道有人腸斷也
渾不語醉如癡

前調

李之儀

今宵莫惜醉顏紅
十分中且從容
須信歡情回首似旋風
流落天涯頭白也
難得是再相逢
十年南北感征

鴻恨應同苦重重休把愁懷容易倒書空只有琴尊堪
寄老除此外盡蒿蓬

前調

李之儀

闌干拍遍等新紅酒頻中恨匆匆投得花開還報夜來
風惆悵春光留不住又何似莫相逢 月牕何處想歸
鴻與誰同意千重婉思柔情一旦總成空彷彿么絃猶
在耳應為我首如蓬

前調

賀鑄

麝熏微度繡芙蓉。翠衾重畫堂空。前夜偷期相見却匆
匆。心事兩知何處。問依舊是夢中逢。坐疑行聽竹牕
風。出檐櫳杳無蹤。已過黃昏才動寺樓鐘。暮雨不來春
又去。花滿地。月朦朧。

前調

葛勝仲

昏昏雪意慘雲容。獵獵霜風歲將窮。流落天涯憔悴一山
翁。清夜小窓圍獸火。傾酒綠。借顏紅。官梅疎豔小壺
中。暗香濃。玉玲瓏。對景忽驚身在大江東。上國故人誰

念我晴嶂遠暮雲重

前調

呈劉
無言

葛勝仲

浮家重過水晶宮五年中事何窮無恙山溪鬟影落青
銅欲向舊遊尋舊事雲散彩水流東苔花向我似情
鍾舞霜風雪濛濛應怪使君顏鬢便成翁賴是尋芳無
素約端不恨綠陰重

前調

周紫芝

夕陽低畫柳如煙淡平川斷腸天今夜十分霜月更娟

娟怎得人如天上月雖暫缺有時圓
斷雲飛雨又經年思淒然淚涓涓且做如今要見也無緣因甚江頭來
去雁飛不到小樓邊

前調

周紫芝

碧梧和露滴清秋小庭幽翠煙流羞帶一襟明月上高樓
苦恨秋江風與月偏管斷這些愁此情空道兩綢繆
信悠悠幾時休到得如今剗地見無由擬待不能思
想得無限事在心頭

前調

謝逸

一江秋水碧灣灣繞青山玉連環簾幙低垂人在畫圖
間閒抱琵琶尋舊曲彈未了意闌珊飛鴻數點拂雲
端倚闌看楚天寒擬倩東風吹夢到長安恰似梨花春
帶雨愁滿眼淚闌干

前調

謝逸

杏花村館酒旗風水溶溶颺殘紅野渡舟橫楊柳綠陰
濃望斷江南山色遠人不見草連空夕陽樓外晚煙

籠粉香融淡眉峰記得年時相見畫屏中只有關山今夜月千里外素光同

前調

葛 郊

亭亭鶴羽戲芝田看羣仙起清漣綠蓋紅幢千乘去朝天留得瑤姬清夜舞人與月鬪嬋娟憑闌有恨不堪言倩誰傳曲聲圓寫盡清愁香弄晚風妍不羨山頭窺玉井花十丈藕如船

前調

用前韻

葛 郊

鄰鄰白水護青田想真仙弄清漣十里香風吹下碧雲
天月在草堂人未寢松竹暗水娟娟夜闌何事悄無
言怨空傳事難圓欲借寒光誰與伴清妍待得凌波人
肯住呼玉笛勸金船

前調

呂渭老

曉參垂戶宿醒醒坐南亭對疎星點點螢光偏向竹梢
明望斷長空何處是雲葉亂彩霞橫西樓依舊抱重
城小銀屏此時情鴉陣翻叢枯柳兩三聲歌枕欲尋初

夜夢雞唱遠曉蟾傾

前調

呂渭老

聞君見影已堪憐短因緣偶同筵相見無言分散倍依
然做夢楊花隨去也粧閣下繡牀前覺來離緒意絲
絲寫蠻牋倩誰傳魚雁悠悠門外水如天欲上西樓還
不忍難著眼望秋千

前調

王安中

荷花遮水水淪溪柳低垂亂蟬嘶捨轡何妨臨水照征

衣一扇香風搖不盡人念遠意淒迷
騎鯨仙子已相知數歸期賦新詩
更想翟公門外雀羅稀陶令此襟塵
幾許聊欲向北窓披

前調

葉夢得

碧潭浮影蘸紅旂日初遲漾晴漪
我欲尋芳先遣報春知盡放百花
連夜發休更待曉風吹滿攜尊酒
弄繁枝與佳期伴羣嬉猶有邦人
爭唱醉翁詞應笑今年狂太守能
痛飲似當時

前調

大雪興客
登極目亭

葉夢得

踰躑飛舞半空來
曉風催巧紫迴野曠天遙
回望興悠哉
欲問玉京知遠近
試攜手上高臺
雲濤無際卷崔嵬
斂浮埃
照瓊瑰
點綴林花真箇是多才
說與化工留妙手
休盡放一時開

前調

葉夢得

芙蓉開過雨初晴
曲池平
畫橋橫
耿耿銀河遙下蘸空明
一舸吳淞歸未得
聊共住小蓬瀛
問君何事引前

旌趣歸程背高城魚鳥三年誰道總無情試遣他年歌
此曲應尚記別時聲

前調

登小吳
臺小飲

葉夢得

生涯何有但青山小溪灣轉潺湲投老歸來終寄此山
間茆舍半歌風雨橫荒徑晚亂榛菅強扶衰病上巉
巖水雲間伴躋攀湖海蒼茫千里在吳關漫有一杯聊
自醉休更問鬢毛斑

前調

上元

葉夢得

甘泉祠殿漢離宮五雲中渺難窮永漏通宵壺矢轉金
銅曾從鈞天知帝所孤鶴老寄遼東強扶衰病步龍
鍾雪花濛打牕風一點青燈惆悵伴南宮惟有使君同
此恨丹鳳口水雲重

前調

趙長卿

小溪清淺照孤芳蕊珠娘暗傳香春染粉容清麗傳宮
粧金縷翠蟬曾記得花密密過雕牆而今冷落水雲
鄉念平康轉情傷夢斷巫雲空恨楚襄王冰雪肌膚消

瘦損愁滿地對斜陽

前調

梅

趙長卿

年年長見傲寒林壓羣英有餘清曾被芳心紅日惱詩
情玉質暗香無限意偏婉婉儘輕盈今年瀟灑照岐
亭更芳馨也崢嶸無奈多情終是惜飄零誰與東君收
拾取恰風雨挫瑤瓊

前調

夜涼
對景

趙長卿

綵雲飛盡楚天空碧溶溶一簾風吹起荷花香霧噴人

濃明月淒涼多少恨恨難許我情鍾
相思魂夢幾時窮洞房中憶從容
須信別來應也斂眉峰好景良宵添
悵望無計與一尊同

前調

張元幹

夢中北去又南來飽風埃鬢華衰
浮水飛蓬蹤跡為誰催自笑自悲還
自語一杯酒臯如雷曉輿行處覺春
回屑瓊瑰糝莓苔病眼衝寒欲閉又
還開水近人家籬落畔遙認得一枝
梅

前調

康與之

南溪二月雨初晴四郊明暖風輕一雨一風鋪地落紅
英枝上流鶯啼勸我春欲去且留春登臨行樂慰閒
情過長亭暮潮平四面青蕪中是越王城信馬行吟歸
路晚山簇簇柳陰陰

前調

辛棄疾

騰雲殘日弄陰晴晚山明小溪橫枝上綿蠻休作斷腸
聲但是青山山下路青到處總堪行當年綵筆賦蕪

城憶平生若為情試把靈槎歸路問君平花底夜深寒
較甚須拚却玉山傾

前調

用前韻

辛棄疾

梨花著雨晚來晴月朧明淚縱橫繡閣香濃深鎖鳳簫
聲未必人知春意還獨自遶花行酒兵昨夜壓愁
城太狂生轉關情寫盡胸中磊砢未全平却與平章珠
玉價看醉裏錦囊傾

前調

辛棄疾

玉簫聲遠憶驂鸞幾悲歡帶羅寬且對花前痛飲莫留
殘歸去小窓明月在雲一縷玉千竿 吳霜應點髻雲
斑綺牀閒夢連環說與東風歸興有無間芳草姑蘇臺
下路和淚看小屏山

前調

辛棄疾

梅梅柳柳鬪纖穠亂山中為誰容試著春衫依舊怯東
風何處踏青人未去呼女伴認驕驄 兒家門戶幾重
重記相逢畫樓東明日重來風雨暗殘紅可惜行雲春

不管裙帶褪鬢雲髻

前調

博山道中
書王氏壁

辛棄疾

一川松竹任橫斜有人家被雲遮雪後踈梅時見兩三
花比著桃源溪上路風景好不爭些旗亭有酒徑須
賒晚寒咱怎禁他醉裏匆匆歸騎自隨車白髮蒼頭吾
老矣只此地是生涯

前調

聞蟬蛙
戲作

辛棄疾

簾鋪湘竹帳籠紗醉眠些夢天涯一枕驚回水底沸鳴

蛙借問喧天成鼓吹良自苦為官耶 心空喧靜不爭
多病維摩意云何埽地焚香且看散天花斜日綠陰枝
上噪還又問是蟬麼

前調

送元濟之
歸豫章

辛棄疾

亂雲擾擾水潺潺笑溪山幾時閒更覺桃源人去隔仙
凡萬壑千巖樓外雪瓊作樹玉為闌 倦游回首且加
餐短篷寒畫圖間見說嬌顰擁髻待君看二月東湖湖
上路官柳嫩野梅殘

前調

賦梅寄
余叔良

辛棄疾

暗香橫路雪垂垂。晚風吹曉風吹。花意爭春，先出歲寒枝。畢竟一年春事，了緣太早，却成遲。未應全是雪霜姿。欲開時、未開時。粉面朱脣，一半點胭脂。醉裏謗花花莫恨，渾冷淡，有誰知。

前調

曹冠

雨餘乾鵲報新晴。曉風清。曉鶯聲飛。蓋南園遊賞，賦閒情。麥隴黃雲堆萬頃。收刈處，有人耕。淙琤漱玉澗泉

鳴翠峰橫碧雲凝
罨畫園林
鱗素寫難成
盧橘楊梅時
正熟隨處賞飲班荆

前調

盆梅

呂勝已

年年臘後見冰姑
玉肌膚點瓊酥
不老花容經歲轉
數腴向背稀稠如畫裏
明月下影踈踈
江南有客問征途
寄音書定來無
且傍盆池巧石倚
浮圖靜對北山林
處士裝點就小西湖

前調

呂勝已

一鈎新月下庭西繡簾低漏聲遲小宴幽歡依約似當時
嬌盼注人都不語睂黛蹙鬢雲欹綠槐陰下玉驄嘶
苦相催醉中歸可惜明朝秋色滿東籬祇恐又成輕別
也情脈脈恨悽悽

前調

夏夜
觀月

張鎰

飛來冰雪冷無聲可中亭骨毛清卧看東南和露兩三星
驀地神遊天上去呼彩鳳駕雲輶望舒宮殿玉崢嶸
嶸桂千層寶香凝搗藥仙童邀我論長生一笑歸來人

未睡花影送上窓櫺

前調

劉儼

東風吹夢落巫山
整雲鬟却霜紈
雪貌冰膚曾共控雙鸞
吹罷玉簫香霧濕殘月
墮亂峰寒
解璫回首憶前歡
見無緣恨無端
憔悴蕭郎贏得帶圍寬
紅葉不傳天上信
空流水到人間

前調

劉光祖

十分雪意却成霜
暮雲黃月微茫
只有梅花依舊吐幽

芳還喜無邊春信漏疎影下覓浮香 才清端是紫薇
郎別鵷行憶宮牆夜半胡為人與月交相君合召歸吾
老矣月隨去照西廊

前調

晚泊
分水

黃銖

秋風嫋嫋夕陽紅晚煙濃暮雲重萬疊青山山外叫歸
鴻獨上高樓三百尺憑玉楯睇層空 人間日日去匆
匆碧梧桐又西風北去南來消盡幾英雄擲下玉尊天
外去多少事不言中

前調 燈夕

毛 幵

神仙樓觀梵王宮月當中望難窮坐聽三通譙鼓報銅
龍還憶當年京輦舊車馬會五門東 華堂歌舞間星
鐘夕香濛度花風翠袖傳杯爭勸紫髯翁歸去不堪春
夢斷煙雨曉亂山重

前調

毛 幵

倚牆高樹落驚禽小牕深夜沈沈酒醒燈昏人靜更愁
霖惆悵行雲留不住攜手處却分襟 悠悠風月兩闌

心擁孤衾恨難禁何況一春憔悴到如今最苦清宵無
寐極想夢見也難尋

前調

盧祖皋

畫樓簾幙捲新晴掩銀屏曉寒輕墜粉飄香日日喚愁
生暗數十年湖上路能幾度著娉娉年華空自感飄
零擁春醒對誰醒天闊雲閒無處覓簫聲載酒買花年
少事渾不似舊心情

前調

韓 澮

天孫應為織雲裳試宮粧問劉郎湖上波寒依舊遠山
蒼自是老來心事嬾空落拓少年場揮毫閒與試端
相記嚴楊陋蘇張興到一杯微醉亦成章回首片帆西
去也何日更共清狂

前調

韓 澆

雪消霜入小溪舟試浮游上山頭薄薄寒煙依舊未全
收問到梅花開也未吟不盡一春愁襟懷如此老還
休懶凝眸轉深幽詩罷一眉新月又如鉤臘後春前村

意遠回棹穩水西流

前調

汪莘

鷓鴣聲裏別江東綠陰中夕陽紅一點離愁相對景重
重目斷大羅天上客朝玉帝把芙蓉紫陽山下偶相
逢醉金鍾跨蒼龍歸去故山猶帶白雲封洞口桃花如
恨我飄滿地任春風

前調

方岳

牕綃深隱護芳塵翠眉顰越精神幾雨幾晴做得這些

春切莫近前輕著語題品錯怕渠嗔
碧壺誰貯玉粼粼醉香茵晚風頻吹得酒痕如洗一番新只恨謫仙渾
懶却辜負那倚闌人

前調

發金陵

方岳

梅花吹夢過溪橋路迢迢雪初消似恁天寒詩瘦想無
聊聽得草堂人有語能幾日是生朝
亂雲深處洗山瓢鬢蕭蕭酒紅潮回首六朝南北黯魂消縱使鍾山青
眼在不似我侶漁樵

前調

吳文英

翠紗籠袖映紅霏冷香飛洗凝脂睡足嬌多還是夜深
宜翻怕迴廊花有影移燭暗放簾垂尊前不按駐雲
詞料花枝妬蛾眉丁囑東風莫送片紅飛春重錦堂人
盡醉和曉月帶花歸

前調

送桂花吳憲
時將赴闕

吳文英

天街如水翠塵空建章宮月明中人未歸來玉樹起秋
風寶粟萬釘花露重催賜帶過垂虹夜涼沉水繡簾

櫳酒香濃霧濛濛
釵列吳娃腰
裊帶金蟲
三十六宮蟾
觀冷留不住
佩丁東

前調

荷塘小
隱賞桂

吳文英

西風來晚桂開遲
月宮移到東籬
簌簌驚塵吹下半冰
規擬喚阿嬌來小
隱金屋底
亂香飛
重陽還是隔年
期蝶相思客情知
吳水吳煙愁裏更
多詩
一夜看承應
未別秋好處雁來時

前調

送翁五峯自
審江還都

吳文英

西風一葉送行舟，淺遲留。橫汀洲，新浴紅衣，綠水帶香流。
應是離宮城外晚，人竚立，小簾鉤。新歸重省別來愁。
黛眉頭，半痕秋。天上人間，斜月繡鍼樓。湘浪莫迷花蝶夢，
江上約，負輕鷗。

前調

洛北碧
沼小菴

吳文英

長安門外小林丘，碧湖秋。浴輕鷗，不放啼紅，流水透宮溝。
時有晴空雲過影，華鏡裏，翳魚遊。綺羅塵滿九街頭。
晚香樓，夕陽收。波面琴高，仙子駕黃蚪。清磬數聲人

定了池上月照虛舟

前調

春雨上
麓翁

吳文英

一聲玉磬下星壇
步虛闌露華寒
平曉阿香油壁碾青
鸞應是老鱗眠
不得雲砲落海潮翻
身閒猶耿寸心
丹炷爐煙暗
祈年隨處蛙聲鼓
吹稻花田秋水一池蓮
葉晚吟喜雨拍闌干

前調

陳允平

東風吹恨上眉彎
燕初還杏花殘
簾裏春風簾外雨聲

寒拾翠芳期辜負却空脈脈倚闌干
流蘇香重玉連環繞屏山寶箏閒淚薄
鮫綃零露濕紅蘭瘦却舞腰渾
可事銀蹀躞半闌珊

前調

周密

玉肌多病怯殘春瘦稜稜睡騰騰
清楚衣裳不受一塵侵香冷翠屏春
意靜明月淡曉風清樓中燕子夢中
雲似多情似無情酒醒歌闌誰為喚
真真盡日瑣牕人不到鶯意懶蝶情
深

前調

周密

羅牕曉色透花明把瑤笙理瑤箏幾信東風能有幾分
春二十四闌凭玉暖楊柳日海棠陰 依依愁翠沁雙
顰愛鶯聲怕鷓鴣聲人自多情春去自無情把酒問花花
不語花外夢夢中雲

前調

張炎

奇峰相對接珠庭乍微晴又微陰舍北江東如蓋自亭
亭翻笑天台連雁蕩隔一片不逢君 此中幽趣許誰

鄰境雙清人獨清采藥難尋童子語山深絕似醉翁遊
樂意林壑靜聽泉聲

前調

題橫空樓

張炎

下臨無地手捫天上雲煙俯山川棲止危巢不隔道林
禪坐處清高風雨隔全萬境一壺懸我來直欲挾飛
仙海為田是何年如此江山嘯咏白鷗前老樹無根雲
懵懂憑寄語米家船

前調

石孝友

青青楊柳水邊橋水迢迢柳搖搖緩引離觴頻駐木蘭
橈我是行人君是客俱有恨總無聊冰澌波浪煥瓊
瑤舞晴飈拂春潮一片別魂銷盡遣誰招不似嚴陽山
上雪魂易盡雪難銷

前調

石孝友

相逢執手野踟躕立斯須話區區借問來時曾見那人
無忍淚啼痕香不減雖少別忍輕辜霜風搖落歲將
徂景彫踈恨縈紆過盡行雲我在與誰居一掬歸心飛

不去層浪疊片蟾孤

前調

題杜子美
浣花醉圖

林正大

拾遺流落錦官城故人情眼為青時向百花潭水濯冠
纓韋曲杜陵行樂地塵土暗歎漂零園翁溪友總比
鄰酒盈尊肯相親落日蹇驢扶醉兩眉顰磊落平生忠
義膽詩與酒醉還醒

前調

曹良史

夜香燒了夜寒生掩銀屏理銀箏一曲春風都是斷腸

聲杜宇欲啼楊柳外愁似海思如雲 背燈暗卸乳鵝
裙酒初醒夢初醒蘭炷香篝誰為暖羅衾二十四簾人
悄悄花影碎月痕深

前調

詠柳

譚宣子

嫩黃初染綠初描倚春嬌索春饒燕外鶯邊想見萬絲
搖便作無情終軟美天賦與眼眉腰 短長亭外短長
橋駐金鑣繫蘭橈可愛風流年紀可憐宵辦得重來攀
折後煙雨暗不辭遙

前調

宋媛
朱淑真

斜風細雨作春寒對尊前憶前歡曾把梨花寂寞淚闌
干芳草斷煙南浦路和別淚看青山 昨宵結得夢因
緣水雲間悄無言爭奈醒來愁恨又依然展轉衾裯空
懊惱天易見見伊難

前調

蔡松年

半年無夢到春溫可憐人幾黃昏想見玉徽風度更清
新翠射娉婷雲八尺誰為寫五湖真 好風歸路軟紅

塵暖冰魂縷金裙喚起一天星月入金尊留取木樨花
上露揮醉墨灑行雲

前調

王溫季自
北都歸

蔡珪

鵲聲迎客到庭除問誰歟故人車千里歸來塵色半征
裾珍重主人留客意奴白飯馬青芻東城入眼杏千
株雪模糊俯平湖與子花間隨分倒金壺歸報東垣詩
社友曾念我醉狂無

前調

牡丹

段克己

百花飛盡彩雲空牡丹叢始潛紅培養經年造化奪天
功脉脉向人嬌不語晨露重洗芳容却疑身在列仙
宮翠帷重瑞光融爍爍紅燈間錯綠蟠龍醉裏天香吹
欲盡應有恨夜來風

前調

東園
牡丹

段成已

水南名品幾時栽映池臺待誰開應為詩人著意巧安
排調護正須宮樣錦遮麗日障輕埃曉風吹綻瑞雲
堆怨春回要詩催醉墨淋漓隨手灑瓊瑰歸去不妨簪

一朶人也道看花來

前調

賦芍藥
揚州紅

元好問

司花著意壓春魁
綠雲堆擁香來冉冉紅鸞十步一徘徊
花到揚州佳麗種
金作屋玉為階
門前腰鼓揭春雷
倚粧臺
儘人催鶯語
丁寧空繞百千回
不道惜花人
欲去看直待幾時開

前調

內鄉縣
廨茶蘼

元好問

纖條裊雪雪籠葱
翠陰重暖香融
想是東皇滿意與薰

醲百畹種蘭千畝蕙都辦作一簾風
花間人似玉芙蓉月明中下瑤宮只恐行雲歸去捲花空剩著瓊杯斟
曉露留少住莫匆匆

前調

元好問

旗亭誰唱渭城詩酒盈卮兩相思萬古垂楊都是折殘
枝舊見青山青似染綠底事淡無姿
情緣不到木腸兒鬢成絲更須辭只恨芙蓉秋露冷臙脂為問世間離
別淚何日是滴休時

前調 水仙

趙孟頫

柔肌綽約態天然，淡無言帶蹁躑。遮莫人間凡卉，避清妍。承露玉杯餐，沆瀣真合喚水中仙。幽香冉冉暮江邊。珮空捐恨，誰傳遙夜清霜翠袖怯春寒。羅幃凌波歸去晚，風嫋嫋，月娟娟。

前調 梅花

張堃

雪梅幽徑月迷津，水南村竹間門。惟有天寒翠袖伴朝昏。仙圃移根來萬里，空怨煞楚江雲。玉堂深處護仙

真怕京塵染芳魂一種清香占斷百花春只恐東君偏
愛惜桃與李却生嗔

前調

倪璣

牕前翠影濕芭蕉雨瀟瀟思無聊夢入故園山水碧迢
迢依舊當年行樂地香徑香綠苔饒沉香火底坐吹
簫憶妖嬈想風標同步芙蓉花畔赤闌橋漁唱一聲驚
夢覺無覓處不堪招

前調

倪璣

滿城風雨近重陽。濕秋光。暗橫塘。蕭瑟汀蒲，岸柳送淒涼。
涼親舊。登高前日。夢松菊。徑也應荒。堪將何物比愁。
長綠泱泱。遶秋江。流到天涯。盤屈九回腸。煙外青蘋飛。
白鳥歸。路阻思微茫。

前調

劉基

春晴楊柳鬱金絲。有黃鸝。在高枝。正是佳人無語倚闌時。
不理雲鬟。尋斷夢。消瘦損雪膚肌。海棠飄玉燕。交
飛草芳菲。水淪漪。怕見輕蜂小尾。撲香歸。滿鏡容顏憑。

酒染還慘淡對斜暉

前調

劉基

西風吹樹簟涼初露如珠月如梳鴻雁無情不帶半行
書漫倚闌干成小立人老矣倩誰扶中庭梧葉待霜
疎有栖烏夜相呼門外一池寒水落芙蓉為問閒愁還
幾許多似草不勝鋤

前調

舟婦

高啟

芙蓉裙衩最宜秋柳邊頭自撐舟一道眼波斜共晚波

流鶯地逢人回首笑不識恨却知羞
夕陽猶在水西樓漫歸休歎相留教唱灣灣
月子照湖州不怕鴛鴦驚起了怕江上有人愁

前調

漁父

施紹莘

白蘋水蘸蓼花風暮煙中一漁翁一領青蓑襯一樹丹
楓收網棹歌歸去晚風恰順好揚篷不將魚送費迎
逢饌親供儘從容稚子山妻醉面各微紅明日生涯渾
未定看風色任西東

前調

村居

沈 泓

長堤細柳隱虹橋，弄蕭蕭伴漁樵。
醉倚楓林，仰面挂詩瓢。
釋卷正逢秋水漲，臨古渡，放輕舠。
夕陽西下暗牕綃。
雁聲高，笛聲遙。
碧簟涼生，細雨燕歸巢。
隔岸篝燈人，就泊沽濁酒，短扉敲。

前調

沈 麋

浮萍瀲曲小橋邊，似荷錢似花鈿。
秋艇宜人，一路棹添煙。
三徑高情來訪菊，無事爾，此身前。
新生野水碧涓涓。

涓躍魚淵釣絲牽疎柳依依坡岸弄輕妍日落殘霞分
夜影鐘斷處墦鈴傳

前調

沈麋

青山千疊繞城西夕雲低暮霞齊幾抹寒煙烏鵲向林
栖沽得市醪漁艇集鮮鯽美細烹肥持杯招月玉浮
谿望中迷意中題弔賞前賢東野性孤奇遊徧江南山
水地罨畫好夢魂攜

御選歷代詩餘卷四十六